

四庫全書

集部

欽定四庫全書

柯山集卷十九

宋 張耒 撰

七言律詩

和陳器之謝王澠池牡丹

十首新詩換牡丹故邀春色入深山御袍黃粉天然薄

醉臉胭脂分外殷

原注所得牡丹有此御袍黃添色紅二種

開晚東君留意

厚

原注奇花開常晚

落遲晴晝伴春閒

原注洛人以幕蔭花可留半月

狂來滿

插烏紗帽未擬尊前感鬢斑

和聞鶯

冉冉東風萬柳絲啼鶯常自與春期  
妝殘玉枕朝醒後繡倦紗窗晝夢時  
文羽自奇非谷隱好音應合有人知  
風流潘令多才思為爾春來幾首詩

同器之遊大宋陂值雨

微雲護日曉陰陰春去餘芳尚可尋  
詩倚醉豪連卷寫酒逢勍敵百分斟  
山光左右雙屏畫雨脚崢嶸萬羽林

沙路晚晴歸馬疾一梳新月上煙岑

和陳器之苦雨

急雨淒風未肯歸三川煙樹遠淒迷瀉山漲潦千霆怒  
到地重雲萬幕低擾擾泥塗同野鶩蕭蕭昏曉聽鄰雞  
為君一借扶搖便靜掃平郊散馬蹄

依韻和晁十七見招之什

斷送春光酒萬壺敢辭羸馬為君驅桑田日暖鳩呼婦  
楊柳葉深鶯哺雛詩冷有情尋水石年豐無盜起荏蒲

河陽潘令風騷客醉倒樽前許我無

鹿仙山

溪清山秀隱神仙乘鹿真人去幾年  
天地壺中無客到方書肘後有誰傳  
秦皇採藥迷蓬島漢武燒金得紫煙  
真境寥寥在何處未容塵世妄攀緣

寄晁應之二首

強讀詩書歎白頭一官飄泊寄東周  
匏瓜有繫身難去人足無音境更幽  
晚接賢豪寬病思老將文字寫離憂

相思一夕親談笑夢斷雲山相對愁

瑜珥瑤環豁眼明碧梧翠竹照人清同車汲黯今難伎  
挾彈潘郎舊有名自是風流襲家世行看談笑取公卿  
塵埃落魄誰如我一事無成白髮生

喬木

舍北參天喬木長依憑清蔭護高堂鳥啼杳杳重陰合  
風到翩翩翠葉涼已許孤高凌夏日不妨堅老要秋霜  
投身麋鹿無人地非爾煩憂未易忘

竹堂

誰道清貧守冷官，遠家十萬翠琅玕。  
直應流水深相與，不待清風已自寒。  
學得鳳鳴真自許，化成龍去不終蟠。  
知世何世無來者，可是王郎獨與歡。

夏日二首

詩書老去信無功，偷得閒官許養慵。  
山影當庭初轉日，水聲穿竹自來風。  
晚催萱藥昏還斂，日射榴房午更紅。  
覽物賦詩成底事，蕭蕭雙鬢欲衰翁。

重雲卷雨過山來遍  
酒中田到曉迴錯落晴山移斗極  
陰森暗峽宿風雷  
佳人夜夜齊紈恨  
騷客年年鴨鵝哀  
欲見清秋近消息  
月明白露濕蒼苔

至日有感二首

兩逢至日驚身老  
遠寄周南覽物悲  
佳節風煙長慘慘  
他鄉人物自熙熙  
荆榛崢嶸秦關破  
草樹芳華隋苑隳

原注隋有芳華苑在邑東

悵望高歌一回首  
茲辰尊酒莫相違

一卧孤村兩見冬  
獨搔華髮思無窮  
荒山極目漫汗雪



老樹當庭晝夜風佳節妻兒具樽酒茅齋斟酌慰愁翁  
未央曉賀瞻天冕正在爐煙縹緲中

歲暮福昌懷古四首

穀州故城

原北荒城舊穀州文皇功業莽悠悠天戈揮去開東夏  
金甲歸來獻二囚想像英姿輝日月蒼茫故國委林丘  
山川慘慘空回首落日悲風蔓草秋

張子房

謀臣何處不知名誰與留侯敢抗衡  
籌下興亡分楚漢幄中談笑走韓彭  
懼誅老將爭梟首高卧成功更養生  
戡亂直須希世哲乘時兒女漫縱橫

李賀宅

少年詞筆動時人末俗文章久失真  
獨愛詩篇超物象祇應山水與精神  
清溪水拱荒涼宅幽谷花開寂寞春  
天上玉樓終恍惚人間遺事已埃塵

連昌宮

欲問興亡已慘顏桑田滄海變人間無情野水青春在  
不動南山白日閒伐木清溪寒剝啄鳴禽高柳曉緝蠻  
蛾眉皓齒終黃土誰道仙宮有使還

以病在告寄楊器之

飲冷寒中不自知故應病骨易尪羸老人素懶何妨病  
太守兼容得自私雨汗欺風元自濕火雲挾日故行遲  
江樓清絕真孤負正是齋居禁酒時

予元豐戊午歲自楚至宋由柘城至福昌年二十

有五後十年當元祐二年再過宋都追感存歿悵  
然有懷

宋玉臺前官樹林十年孤客獨沾襟白頭青鬢隔存歿  
落日斷霞無古今暮雲梁苑雁鶩暗久泛吳船江海深  
閱世悲歡嗟老眼呼兒取酒十分斟

宿馬莊寺

衝泥我馬僵欲仆空村落日不逢人開門野寺淨如掃  
迎客老僧閒更真佛案青黃園果細齋厨汲洗野蔬頻

年來到處無餘念靜對同龕金色身

永城道中

東行十日何所有衰草白茅梁宋陂大風官樹吹半折  
欲雨野雲垂不飛十年所過半陳迹千里獨愁懷所思  
他日江湖片帆去白頭青鏡久相期

贈柘城簿王微之

青衫得祿苦不足白髮生頭頗有餘賦就相如猶滌器

原注王作  
宋都賦

詩成賈島獨騎驢先生五斗不挂眼漫郎一官

聊讀書自古好賢慚好色何人朝夕駕于株

夜泊泗上阻風雨

雨昏古岸斷人迹天黑孤城閉水闊燈火樽前初擁膝  
風雲淮上欲移山避人魚鳥那足怪吹浪蛟龍不自閒  
便使乘桴亦何事滄波歲晚合知還

喜七兄疾愈二首

淨名居士本非病五禽先生能養身家人但訝少林觀  
鄉里不知顏子貧身內固知精是藥人間惟有道通神

喜聞漸離烏皮几花氣晴來欲逼人

南鄰隱士龍虎鼎

原注陸先生平叔有道之士

東寺比丘堅密身

原注

圓明師戒行無玷

欲知十室有信處顧此兩賢非世人戰勝天

魔初起定

原注七兄已斷世緣

寶成丹竈不妨貧

原注兄新悟道秘

何時

共此閒居士紫領長衫樂社神

送曹子方赴福建運判

平生鄴下曹公子家世風流合有文橫槩尚傳臚相國  
紫髯不是畫將軍詔書寬大民何怨刺史威嚴吏合勤

好作楚詞更下俚雲中一降武夷君

次韻盛居中夜飲

吳衣厭拂洛陽塵  
夢寐一樽淮海濱  
每願脫巾常漉酒  
况逢投轄苦留賓  
蒼龍挂斗寒垂夜  
翡翠浮花暖作春  
上界高真足官府  
追隨却屬散仙人

送麻田吳子野還山

麻田老仙身馭風  
萬里一息如飛蓬  
行窮山川出天外  
閱盡世界歸壺中  
經過賣藥勾漏客  
鄉里高年南極翁



我亦有心遊八極從公一借葛陂龍

和无咎二首

年芳經雨能幾許客愁得暖不肯融眼看乳燕行已哺  
手種小桃隨分紅世情付睡莫涇渭物態逢春無異同  
清時賴是未禁酒須惜紅紫轉頭空

愛酒苦無阿堵物尋春奈有主人家未容黃蜂釀成蜜  
已怕惡雨不容花雲間明月無可攬海中蟠桃良未涯  
浮名誤人不得脫黑髮減來那得加

和門下相公從駕幸學

繼聖文明舉舊章  
儒宮傳蹕駐膠庠  
地疑闕里絃歌宅  
經奏周書隸古行  
遣子東夷思入學  
受成西旅佇來王  
魯侯在泮猶歌誦  
盛事須刊孔子堂

效白體二首

功名富貴付悠悠  
高卧山城又過秋  
燕坐香燈為靜侶  
閒行麋鹿是同遊  
青黃草木新霜過  
瀟灑溪山夜雨收  
回首十年梁苑客  
枉教白卻少年頭

州貧須惜尊疊費俗陋兼無妓樂名幸有蒲團供燕坐  
不妨藜杖助閒行看炊香稻供齋飯自採寒蔬試野羹  
身外無營內無事近來心氣儘和平

效白體贈楊補之

青衫居士斷葷血一榻蕭然如在山堂下黃花驚歲晚  
尊中綠酒覺官閒胸中已了一事大鏡裏莫驚兩鬢斑  
我亦久懷伊洛興煩君先為卜禪關

雙槐晚秀三月一日初見新葉

東皇無處著繁華亦復分張到我家他日老蒼悲敗枿  
今晨嫩綠出新芽禿翁承弁織纖髮村婦縈鬟草草花  
桃李蹊中人絕跡綠陰門巷正藏鴉

休日不出聞西池遊人之盛

三日春風塵漲天溝泥愁汙破鞍韉掃門靜閉無來客  
隱几深居學坐禪薄雨掠塵時點點細蟾窺夜獨娟娟  
都人解與殘春競半在西池聽管絃

送李公輔赴宰宣城

與君騎竹即同遊  
抱子相看髮已秋  
莫惜往來勤馬足  
未須容易轉船頭  
君方搜句窻間岫  
我已懸情天際舟  
抱槩石渠無所欲  
勞君時致管城侯

休日不出

久厭衣冠塵土浸  
賜休何苦馬駸窮  
冬積雪春不雨  
昨日殘紅今綠陰  
卻掃不知門外事  
安禪深得靜中心  
讀書陶令非求解  
禁酒揚雄不待箴

次韻王敏仲至西池會飲

聖朝無復用舟師，戲遣艤艫插戟枝。  
沸浪有聲黃帽動，春風無力彩旗垂。  
不勝杯酌寧辭醉，傳語風光共此嬉。  
遠比永和真繼軌，臨摹璽紙看他時。

次韻王敏仲池上

春晚餘芳尚可尋，晴雷沙岸走車音。  
苑分廣樂和聲度，池受晴天倒影深。  
席上宮花輝御醴，坐中瓊樹間瑶林。  
歸人自畏嚴城鼓，卻望橋西日未沈。

題外甥楊克一詩篇末

十年不復上天津間卻西都幾度春里巷夢中迷向背  
山河句裏見精神藝成斧鑿真須棄學富篇章自不貧  
莫倚詠兒兼贈婦須知漸與老為鄰

題李方叔文卷末

他日東坡譽子文瀾翻健筆欲凌雲決科正爾真餘事  
射策如何但報聞詭御獲禽雖可鄙挽弓射葉亦徒勤  
莫辭更擬相如作寂寞思玄未放君

劉景文許惠氍毹未至督之

案原本首句  
脫去五字

毳毛軟于春絮膩于膏鑿鹽倦客愁無褐

案第三句亦  
脫去五字

贈袍雅服何妨冠蕪帽瘦腰兼稱束鄙條

想公封寄應多憾不挂長身襯佩刀

未嘗病痺親友以酒為戒作小詩戲答

離騷僅得比痛飲旨酒何曾廢善言因病細斟尤有味  
無人獨酌亦成歡何須巾漉醅浮螳不待杯邀月入樽  
但看井眉瓶作土鴟夷仍自穩隨軒

和呂與叔秘書省觀蘭



千里猗猗誰取將忽驚顏色照文房  
每憐墜露時施澤更許光風為汎香  
獨秀已先梁苑草託根寧復楚天霜  
坐令黃菊羞粗俗只合蕭條籬下芳

次韻秦七寄道潛

衰疲久厭五更朝每愧冥鴻在次寥  
顧我塵冠彫舊髮愛君山桂長新條  
文詞畫虎工逾拙世味春冰老益消  
只欲歸依香火社高堂時聽法音潮

和宋二上元迎駕

拜揖清光咫尺間  
彫輿欲動更移班  
蓬萊不動鰲頭穩  
閭闔未開天上閒  
老去一官羞簡策  
春來歸夢滿淮山  
自慚衰病獨隨俗  
醉逐遊人月下還

和張提舉

案原本首句  
脫去五字

國東自慚多病幸  
優容喜來丈室談  
何妙

案第三句亦  
脫去五字

莫從宛水春生初  
縹緲鍾山雪盡見  
蟠龍

新年強起尋芳物  
零落宮梅白一重

書壁

晴窗浴罷試春衣芳草江南三月時陰合園林禽語樂  
風和庭院絮飛遲漫郎官事只畫諾騷客生涯惟賦詩  
極目江天已多恨何須木落長年愁

和上維道祈雨有應

江鄉長夏亢陽驕太息秋原稻穗焦暑氣暮收秦地火

原注項羽火威  
陽三月不息

雨聲秋響浙江潮

原注五月  
雨勢甚大

夜齋涼送

簷間滴曉枕清聞竹上飄椒醑禮神慙德薄聖朝當宁

四時調

早秋感懷

一行為吏百事廢幸此村州終日間莫疑虎兇率曠野  
正見虎豹守天關櫳簾晝靜燕已去陂澤風高鴈欲還  
老見功名真戲事惱人何苦鬢毛斑

木芙蓉菊花盛開

空山岑寂何所有晚菊芙蓉相對幽伴我悠悠過閒日  
憐渠灼灼媚窮秋清香但欲持供佛醉舞何妨插滿頭  
此生萍梗難前料知復明年相見不

正月八日坐局沽酒

為問里閭何蹠躐上元  
楚俗習張燈新春此時最佳處  
獨我坐曹如定僧  
霜林夢澤蒼茫野  
煙草江邊寂寞城  
小飲未能來喚藁雙眸終日冷如冰

神宗皇帝挽詞三首

獨化陶鈞運聖謨  
八方寥廓入雄圖  
將軍已勒邊山頌  
博士初脩玉檢書  
西望忽驚新石闕  
東來不是舊金輿  
編年誰秉丹青筆  
流落周南一腐儒

三百年成玉鼎丹  
縞帷驚變紫宸班  
遺弓有淚哀何及  
嘶馬無蹤去不還  
霜露無情金闕暗  
山川常在石麟閒  
青衫曾賜當年桂  
欲附龍髯不可攀

風霆武略走夷蠻  
雲漢文章著不刊  
萬世基扃傳夏啓  
百年威德畏軒轅  
月游渭水儀空在  
舞罷西陵淚未乾  
腸斷反虞歌徹後  
滿山松柏夜霜寒

太皇太后挽詞

坐安民物由修己  
默合神明為至公  
他日已占懷月夢

後來方信補天功  
四時化育坤無事  
六合清明日正中  
九載憂勤已陳迹  
空留雙闕對青嵩

范忠宣挽歌二首

晚生長恨老成空  
猶及風流正始中  
經國謀猷號名相  
傳家正直似先公  
回天巨力章猶在  
拯溺深言老更忠  
誰念人心弔邦國  
新阡客泣白楊風

瀟湘卧病弔纍沈  
賜詔君王用意深  
多士方懷宣父日  
蒼生竟失傅巖霖  
旣衰他日瞻吾父  
丹宸何人附舊箴

白首門生恩未報悲詞空想薤歌音

黃幾道哀挽

風流正始久無聲頗復因公到後生千里族人分俸祿  
百年鄉黨守題評青雲脫屣烏臺峻白首含香畫省清  
但得將軍桃李在寧須公相寫銘旌

鄧慎思學士挽詞

青衫獻賦逢知己白首耽書還誤身名著道山傳故事  
政行兩郡泣遺民文成典午羣疑泮

原注當  
注晉書

詩和少陵



佳句新歎息苦身成底事湖墳宿草已愁人

潘處士挽詩

異時輕士老才良況復程能翰墨場酒裏浮沈真得計  
生涯落魄定何亡德尊故社江山永文付諸孫虎豹章  
環堵如今空五柳蕭然風物似柴桑

挽李少卿

幾年林下遠埃塵儒雅風流誰與鄰筆尾病來猶壯健  
詩情老去更清新幽齋昔日琴書換新冢東風草木春

懷想只疑高興在一吟遺句淚沾巾

七言長律詩

上文潞公生日

盛德元勲絕等倫麟符虎節冠宗臣靈椿上古身千載  
一柱明堂力萬鈞伐叛豹韜威尚凜刊名金鼎鑄來新  
風謠四海占賢相笑咏山川是主人萬里山河供氣概  
九秋鷗鶚入精神光華稷契無窮譽強健喬松不老身  
坐鎖熊羆瞻繡袞燕居松鶴伴綸巾只應便是神仙事

方丈蓬萊卻未真

至日有感

前年至日在何處寒事蕭蕭客許昌  
乞火夜溫行客酒披裘曉冒五更霜  
暮投陽翟荒涼驛正見人家燈火光  
饑馬卧嘶毛瑟縮羸童曉對色蒼茫  
二年旅宦孤村僻東望歸心洛水長  
佳節幾逢長索寞我生何事苦淒涼  
更無賓客青山滿只有風霜老樹蒼  
昭代寧須厭留滯馮公白首任爲郎

清明卧病有感二首

丈離卧病逢佳節  
漂泊西遊寄洛城  
重帽畏風惟益睡  
青筇扶步不禁行  
紅飄殘萼知風急  
綠滿新枝聽鳥聲  
不見賈生遺宅處  
空傳金谷舊園名  
悲歌身世驚將老  
悵望古今空復情  
笑看家人競時節  
爭持新火照清明  
飄洋著處即為家  
伏枕悠悠對物華  
處處鞦韆競男女  
年年寒食亂風花  
藥囊親坐勞頻檢  
酒甕生塵亦可嗟  
未老會尋吳市卒  
苦貧須種邵平瓜  
雲煙南望羣山會

水樹東浮去路斜行止此身應有命不須辛苦問生涯

柯山集卷十九

欽定四庫全書

柯山集卷二十

宋 張耒 撰

五言絕句

江上二首

相別亦何事相逢盡偶然  
愁腸貫綵筆離夢繞朱絃  
紛紛渾是夢黯黯只消魂  
江上浪無限舟中酒一樽

暇日六詠

雙白鴨

已斷鷹隼猜仍叨主人惠皎潔靜天姿雙棲莫相忌

蛙

越國未亡吳曾動君王意句踐自有心憑車汝無恃

百舌

曉語月斜樹晝啼春霽天宵中自有激不是故多言

柳絮

零亂委空風悠揚點芳草却為身最輕華堂等閒到

龜

映日漾清淵  
沿沙暴元甲  
愛爾千歲姿  
藏身一蓮葉

槐庭

清陰滿我庭  
蒼蒼六槐老  
野性苦避人  
青苔不須掃

春日書事

禪宮門寂寂  
庭草無行迹  
東風自掃堦  
疑是開簾客

鹿邑道中

去歲秋時去  
今年秋又來  
浮名何所得  
歲月苦相催



予元祐六年六月罷著作佐郎除祕書丞是歲仲冬復除著作郎兼史院檢討復至舊局題屏

庭樹應如我相逢益老蒼別來秋苦雨但覺瓦松長

絕句

雨麥渾漫壠風梅已退粧高鴻望燕塞飛疾不成行

畫卧口占二首

人事日益遠秋居何颯然苔隨牆半雨葉放樹中天  
擾擾終何得蕭蕭亦自如將求解牛道要解斲輪書

發金陵折柳亭二首

匆匆十日事回首亦淒涼何處無芳草行人休斷腸  
瞿曇昔教我林下一宵行何事春江上依依作俗情

昔蘇先生遊廬山詩云平日懷真賞

崇蘇軾集作  
自昔懷真賞

神遊香霧

間如今不是夢真個有廬山

崇有字蘇軾集王氏注  
本作在施氏注本作是

輒繼一首

人生孰非夢夢裏見廬山若了元無夢何曾有往還

蘇先生詩云芒屨青竹杖自掛百錢遊何事春山

裏

崇蘇軾集何  
事作可怪

人人識故侯輒繼其後

齋心禮仙聖不是愛山遊山中笑何等白髮故諸侯

六言絕句

登山望海四首

江濶風烟易晚山高草木先秋獨倚闌干盡日此身與  
世悠悠

仕宦此身漫爾功名已老茫然山鳥不須驚客相親此  
復窮年

西望揚州何處雲中雙塔巔岼山外雲濤斷日夕陽應

近長安

鳥去蒼烟古木人歸綠野孤舟信美雖非吾土消憂且  
復登樓

書寺中所見三首

江市樵蘇早散山家燈火常昏紗帽揔筇獨立龕中佛  
像無言

日出鄰僧乞食鐘鳴老叟關門誰見春宵淨境娟娟霽  
月當軒

叩戶誰驚午睡烹茶聽客論詩病裏雖成禁酒興發何妨杖藜

讀潘郎文卷

霜鬚我猶謫宦媚鬚子合封侯老拙何勞咄咄踈慵且復悠悠

夜坐三首

門庭草草是客寢室泠泠似僧春寒猶須篝火夜書頗復明燈

靈通寺前老圃畦  
蔬想見如雲謀拙嗟予飄泊歸來與爾知聞

微寒騷屑宵竹淡月朦朧  
夜天路暗城頭傳警漏稀更士高眠

贈廣靖上人

七十龐眉禪客曾見天衣老人  
梅檀林中香氣悠然時有餘氣

六言

青春要去便去美酒得斟且斟莫問世間蹀躞須知老境侵尋

乾明院門望江山懷淮陽城南步二首

危臺寺東野水春來柳色鵝黃江上滄波似屋蛟龍作惡難量

憶昨淮陽把酒目前惟欠山林江上雲岑千壘何為特地愁心

和子瞻西太一宮祠二首

太一祥儲世世祠宮歲事年年絳節霓旌何處松庭玉  
座蕭然

玉笋清晨薦酒天風靜夜飄香鳳吹管截孤竹琴弦曲  
奏瀟湘

白沙閘西艤舟亭下二首

倦客時時醉眼津亭日日春寒目極傷春懷抱黃昏猶  
在闌干

客恨如雲冉冉風光似水迢迢回首十年舊事令人淚



盡魂消

秋園雜感二首

秋晚園林疎靜天高風日明  
鮮中有堵筇病客三杯外  
酒醺然

世事我深諧委人生他自奔忙  
刻木牽絲作技幾回弄  
罷淒涼

七言絕句

寄都下舊友二首

一別長安西復東琵琶舊地已應空  
當時風景歸何處  
須信人生是夢中

城西古地昔同遊望月思家相對愁  
明月秋來應更好  
何人看月又悲秋

秋思

故人陳迹生蛛網古殿苔深疊綠繒  
簷雨晚秋鳴摘葉  
窻風深夜觸孤燈

魚蝦相望

悲歡回首兩茫然憶別龍門又半年應是舊時歌舞處  
和風開凍一層天

臘月殊有春意二首

一夜長風無片雲曉來風動似初春應知春近催桃李  
更有輕寒不著人

拂檻垂楊雪後青誰家朱閣曉來晴拂簾動幕無人解  
先把春愁寄有情

送李十之陝府

斷蓬泛梗偶相依一別重逢又幾時  
人世悲歡消遣盡  
為君流淚忽霑衣

送客愁

數星點點間微河城上三更樹影  
蹉霜落夜深風悄悄  
月明無限客愁多

夜坐

半消爐火夜三更欲滅青燈暗  
又明閉戶無人瞑目坐  
此時一念悟浮生

欽定四庫全書

杜山集  
卷二十

予向集賢殿罷試寓居京師嘗遊西岡錢昌武郎  
中之第時同會者河東柳子文與錢氏三子夏中  
予出京今纔半年而昔所共遊者或東或西有不  
知所之者古人所謂俯仰之間已為陳迹者歟夫  
求昨日之我于今日終其身而不得而況偶然相  
值聚而旋散者歟追記春睡詩一首乃寓錢第所  
為者

東風冷峭著衣寒雲影深沉美睡天青杏園林花盡落

晚風吹雨濕鞦韆

上元都下二首

淡薄晴雲放月華  
晚粧新暈臉邊霞  
管絃樓上爭沽酒  
巧笑車頭旋買花

騎馬金鞭白面郎  
雙鬟小女坐車箱  
輪聲轆轤歸何處  
留得紅籠絳蠟香

荆軻

燕丹計畫問田生  
易水悲歌壯士行  
嗟爾有心雖苦拙

區區兩死一無成

送聖民出城即事

東風堤上送行人  
漸出城來漸少塵  
柳色已深花又落  
客來下馬獨傷春

西湖三首

沙鷺汀鷗盡日閒  
水邊風起萬荷翻  
客來莫厭重樓望  
樹杪闌干直對山

水上亭臺涼氣多  
扣舷倚棹唱吳歌  
何人為放青蓮出

剪却翻翻一萬荷

一曲清池柳岸風長苗新稻短蒲茸功名由命何須問  
幸有滄浪作釣翁

別錢筠甫三首

倦客無眠聽曉鐘五更蠟燭淚消紅城西古寺來何處  
今日分携獨向東

春燈欲盡曉雞啼殘月影中征馬嘶為語相逢不消喜  
相逢終有道分離



原頭綠盡柳初芽落月滿川風滿衫已過寺西三十里  
為君回首駐征銜

偶題

屋角纖纖掛斷虹清蟬一噪起高桐天涯雲盡見殘日  
林下雨餘來好風

宿錢睦甫南齋

瀟洒南軒與病宜庫牀長簟碧紗幃三更月上夢初覺  
竹影滿窗風入衣

夜

斗柄闌珊風瑟瑟銀河錯落露森森  
人聲靜後幽蟲急  
月色好時清夜深

田家二首

門外清流繫野船白楊紅槿短籬邊  
早蝗千里秋田淨  
野秫蕭蕭八月天

新插茅簷紅槿籬秋深黃葉已飛飛  
灘頭水濶孤舟去  
渡口風寒白鷺啼

謁僧不值

古寺人閒僧掩扉客來下馬解塵衣  
雙松帶月風蟬噪  
古閣鳴鐘夕鳥歸

中秋夜酌

一片秋天碧萬尋月華初上水沈沈  
遣愁不用先愁醉  
更看清光到夜深

舟行六絕

獵獵西風秋水清  
野花寒草傍流生  
沙邊水鶴待魚立

石底暗蛩先夜鳴

船尾初回轉野灣波平天淨惜投竿飛飛小蝶秋花晚  
嘖嘖沙禽野水閒

落景秋雲晚不開天寒古岸野船回初驚波面微瀾起  
已覺風前細雨來

渡頭風雨晚生寒蓑笠漁翁坐釣船為問篷中有魚否  
一雙新鰕出籠鮮

天寒野店斷人行晚繫孤舟浪未平半夜西風驚客夢

卧聽寒雨到天明

渡頭烟雨欲昏天  
灣畔枯桑繫客船  
風打篷窗秋浪急  
一杯寒酒夜酒眠

書潁州皇甫秘教書室

聞來便是日侵階  
窗下棋枰林下杯  
曉解扁舟又南去  
百年還得幾回來

初離陳寄孫戶曹兄弟

三年流落寓于陳  
一命青衫淮水濱  
城北橋邊長送別

扁舟今自作行人

望淮山硤石寺予幼年過此今十載矣

十年落泊竟何成人事紛紛幾廢興今日扁舟淮上去  
青山似與客相迎

題壽陽樓二首

渺渺長淮去不休行人獨上壽陽樓一闌長歌不須唱  
山川都是舊時愁

長淮不斷水悠悠樓下行人淮上樓誰謂滿前風景好

古今供作別離愁

淮上曉望

酒醒窗明月半川  
怯將病齒漱寒泉  
樓西別有清秋色  
一片淮山在曉烟

宿南山普濟院

閃閃青燈照薄帷  
幽人不寐自吟詩  
僧來邀我更深坐

待聽山風到樹枝

原注宋景瞻和云可憐萬里南飛翼肯向霜林借一枝

旱池

藕梢菱蔓綠纔深日射遊魚聚岸陰  
啣沫已知為計盡  
渚鷗沙鷺亦何心

湖上成絕句呈劉伯聲四首

湖北風來吹曉鐘湖邊漁客閉船篷  
波光不動天光濶  
更在浮烟細雨中

風蕩雲容不成雪柳偷春色放衝寒  
湖邊艇子衝烟去  
天畔青山隔雨看

野岸北風歸客愁浮烟不動雨颼颼  
圍成野色紫紆岸



點破湖光三四鷗

誰道原頭春未回  
柳梢黃軟凍齊開  
爭驚臘日崢嶸盡  
忽問田翁乞野梅

偃王城

蔓草悲風知幾秋  
黃桑晚葉野雲愁  
偃王城下樵蘇盡  
猶有耕人指舊邱

自上元後閔作五首

閭闔樓南粉署西  
舊時種柳長應齊  
如今冷落窮山縣

卧聽春風百鳥啼

東風吹雨夜侵階  
樓角長烟曉未開  
何事舊時愁意緒  
一番春至一番來

面冷春霜拂瓦乾  
曉風吹雨凍闌干  
柳梢黃弱梅苞破  
更放東君幾日寒

燈火人家夜不收  
三更明月過南樓  
風烟隨處自能樂  
何事客心還獨愁

喧喧野縣自笙歌  
風卷高雲天似波  
誰謂樓前明月好

月明多處客愁多

寫情二首

牆外誰家桃李開  
何由花下一徘徊  
先教飛絮傳愁去  
却遣游絲取盡來

人閒漏永報春暉  
日過簷牙夢未回  
隔夜雨飄梅蕊盡  
入簾風捲柳花來

題扇二首

越衫羅薄逐新涼  
扇剪青綃秋水光  
花前一把羅敷手

直到花殘襟袖香

彎彎涼月帖淮天  
露濕蒲梢風墮蓮  
松蓋草茵迎不至  
南山桂子老秋烟

淮陰

蘆梢林葉雨蕭蕭  
獨卧孤舟聽楚謠  
生計飄然一搔首  
西風沙上趁歸潮

宿銅陵寺題壁

僧房秋夜月明  
天下馬擁裘人悄  
然老僧何事亦晨起

清磬一聲驚客眠

將之天長題新亭壁二首

新亭登眺解征鞍飛鳥悠揚雲意閒誰謂塵埃無野興  
故乘風雨看秋山

雲捲山光到眼前滿川搖落早秋天客來來繫馬成何事  
風雨寒宵一覺眠

過漣水

城頭落日在旗竿城外長淮水浸天左海門前燈火盡

鶻聲嘔軋夜深船

春宮

團金袍袖繡長靴  
寒食宸遊樂事奢  
風擺珠簾紅幕潤  
滿宮春雨落梨花

效李商隱

夜深傳警報更籌  
霜桂月華寒未收  
昨夜雨昏今日朗  
一番風雨一番愁

楚城曉望

鼓角凌虛雉堞牢  
晚天如鑑絕秋毫  
山川搖落霜華重  
風日清明雁字高

楚橋秋暮阻雨

水滿城西釣艇橫  
雲豪風弱晚冥冥  
天寒小店人愁雨  
燈暗孤舟客卧聽

柯山集卷二十

欽定四庫全書

柯山集卷二十一

宋 張耒 撰

七言絕句

吹角

斷霞歸鳥隔山鐘  
日過西山轉海空  
長恨南城催曉急  
五更吹角怨秋風

登槎亭



海天秋霧暗乘槎風響空山浪卷沙杳杳鴈聲何處客  
一帆衝雨暗天涯

臘

荒秋野水間荆榛惟有青山日對門草木向陰猶帶雪  
風光近臘已如春

題宅後井

原注泉色正白

清泉十丈白如漿甘似醍醐透椀涼君欲道中無渴死  
百尋操綆莫辭長

和房日嚴換武詩

青衫厭著待封侯  
慷慨知君定遠流  
莫歎書生長齷齪  
元戎曾與報更籌

春

磔牛門外色初分  
共喜釵頭彩勝新  
花萼怯寒猶積雪  
鳥聲催報已知春

感春三首

日長殘雪滴高簷  
院靜人間風度簾  
可是歲華隨日好

故應愁恨逐春添

水消水面波光動日暖樹梢花意歸世上繁華隨日好  
却應春淺勝芳菲

梅稍柳眼弄春嬌雲暖南山臘雪消近郭樵漁成野市  
遠林簫鼓隔溪橋

荒園

荒園午日照青蕪樹罅鳴鳩相應呼一片陰雲送山雨  
漸漸新麥地親鋤

小雨

蕭蕭小雨不能收  
一霎西風便似秋  
枕席夜涼燈火暗  
丁丁更漏隔南樓

看花

風暖日高花氣動  
鳴鳩乳燕自求羣  
經營美景還詩匠  
傾掃頑愁賴酒軍

題唐宋輔城上小樓二首

沙田小雨不成泥  
一帶溪光照翠微  
遠目直隨殘日盡

晚雲還望故山歸

近郊小徑絕人行  
水滿菰蒲取次生  
沙岸雨來長集燕  
桑田深處忽聞鶯

晚歸

學省歸來門巷秋  
伴眠書史滿牀頭  
低雲漠漠梧桐晚  
屏上江山亦解愁

秋

日落星稀河漢微  
清秋一點水螢飛  
涼風白露愁先覺

可待梧桐報即知

調金玉病二首

維摩丈室自蕭然  
病起新涼得恣眠  
我愧聲聞難問疾  
想君獨對散花天

詩將收功久戢戈  
羸師再鼓奈疲何  
想君無物驚禪定  
獨未能除是此魔

女几山

不復當年端正樓  
多情猶問故宮遊  
山川不改繁華盡

須信人生一世浮

昏昏

昏昏落日下墻東  
歷歷晴雲送去鴻  
歲晚蒼槐甘老大  
盡將黃葉付秋風

謝仲閔惠友于泉

原注上上  
多紫竹

地吉泉甘慶所鍾  
直疑遙與惠山通  
曲肱煩暑都消盡  
如卧蕭蕭紫竹風

貧病投劬乞補外  
官親友問者以詩答之

卑如揚子官執戟貧似玉川居洛陽不敢彎弓輕妄射  
爭如覆被逐山郎

楚王

十二巫山聳翠巒楚王宮殿玉巔岼定知為雨為雲處  
不似當初夢裏看

宋玉

雲雨朝朝峽裏興可能無復夢中情巫娥若問誰為賦  
敢乞君王道宋生



項羽

沛公百萬保咸陽自古柔仁伏暴強慷慨悲歌君勿恨  
拔山蓋世故應亡

范增

君王不解據南陽亞父徒誇計策長畢竟亡秦安用楚  
區區猶勸立懷王

蕭何

蕭公俯仰繫安危功業君王心獨知猶道邵平能緩頰

君臣從古固多疑

韓信

登壇一日冠羣雄  
鐘室倉皇念蒯通  
能用能誅誰計策  
嗟君終自愧蕭公

賈誼

賈生未免孝文疑  
自古功名嘆數奇  
逐得洛陽年少去  
白頭絳灌亦何為

李廣

李廣才非衛霍儔孝文能鑒不能收君王未是忘征戰  
何待高皇萬戶侯

東方曼倩

軒冕功名何足為先生聊作易農資漢庭誅死皆卿相  
猶說才能勝滑稽

成帝

百華衣上漬餘香夜照猶煩蚌有光解道溫柔勝武帝  
不知壯髮似元皇

趙飛燕

苦心膏沐不論貧富貴人生各有時直使中流畏仙去  
君王何啻似嬰兒

朱雲

直言請劍斬安昌勿謂朱游只素狂君看漢家文景業  
張侯能以一言亡

孔光

鄉原世盡謂醇儒漢室傾危孰與扶試問不言溫室木

何如休望董賢車

梁冀

力回漢鼎未收功又道將軍世上雄  
不悟折腰同齟齬百般裝束為秦宮

殷浩

田野高風過有薰廟堂經畫竟無聞  
固應竹馬思元子江左興亡不在君

偶成

低雲著地曉悠悠雨濕簾旌不上鉤江北江南千萬里  
年年長向此時愁

傷春

浮雲冉冉送春華怯見春寒日欲斜一夜雨聲能幾許  
曉來落盡一城花

七月六日二首

月落暗蟲啼不休五更白露曉悠悠西風是處將搖落  
可但梧桐獨報秋

全  
卷二  
一  
積雨空堦生綠衣  
幽幽點點弄秋姿  
黃昏樓角看新月  
還是去年牛女時

元忠學士八兄來離京師遠蒙追送許惠服丹法  
託故竟未惠及賦五絕句

身逐孤舟似斷雲  
故人追送尚殷勤  
秋城夜泊西風岸  
落葉悲蟲獨自聞

衰柳苦催空壁月  
悲蟲真弔短檠光  
無情少壯拋人去  
只有窮愁氣味長

欲盜羲和一點春五更注想隔重雲如何但欲獨不死  
分我刀圭未費君

昔見將軍破虎韜玉堂曾共掃千言功名老去皆蹉跎  
相見諄諄勸學仙

無復顛狂似少時逢君猶自說蛾眉玉堂舊事君休念  
雨袖啼痕又送誰

閒步

枝上啼鴉巢欲成晴簷向日乳鳩鳴可憐霜雪餘威盡



春草無名著處生

寓楚題楊補之官舍

一辭螭陛走天涯  
客路悠悠老歲華  
住久不知身是客  
自來堂下採黃花

傷春四首

曉雨催春不惜花  
亂紅飄泊委泥沙  
傷心憶得年時事  
白髮風前只嘆嗟

紅杏牆頭最可憐  
膩紅嬌粉兩娟娟  
曉來併逐東風盡

容易分飛又一年

嫩紫妖紅惜不得  
亂隨風雨點蓬蒿  
荒田野草花開晚  
主管春光輸爾曹

高樓春晝獨驚心  
白日閒雲亦自陰  
風雨催花花已盡  
滿城新綠亂鳴禽

三鄉道中遇雨

蕭蕭古道西風雨  
慘慘黃昏匹馬行  
未遇功名莫嗟嘆  
逢時更自憶平生

題南禪院壁二首

乞食高僧午未歸  
秋庭落葉日暉暉  
蕭條古寺松陰下  
簷鐸風中乳鴿飛

秋林落葉已斑斑  
秋日當庭尚掩關  
掃榻晝眠聽鳥語  
可憐身世此時閒

次韻王彥昭感秋三首

木落風高秋雁歸  
初晴野水漲清伊  
東流會向淮南去  
憑寄秋來無限悲

年來詩酒最關身滿酌休論薄與醇  
愁見洛陽秋夜月無情偏照不眠人

塵埃容易點吳衣澤國秋來信息稀  
想見淮南初木落秋雲秋水鴈初飛

絕句三首

藹藹晴郊花氣浮午窗正睡擁駝裘  
覺來鳥雀茅簷靜屋角春風怒未休

照水輕明楊柳牙隔林相映占巢鴉  
東風香草城邊路

到處人家盡是花

淮上春風萬鼓聲  
落帆舟泊岸邊磯  
喧喧野市殘陽裏  
沽酒攜魚客散歸

雨後遊朱園

綠葉陰陰護翠枝  
晚花雖小亦應稀  
東風不惜殘桃李  
吹作春愁處處飛

酒病中寄李十二招飲五首

班郎握筆未封侯  
嗜酒揚雄欲白頭  
寂寞著書誰作伴

兩枝風葉碧梧秋

酒病岑岑更怯寒一窻疎雨擁衾眠西風一入庭前樹  
便有秋聲到枕邊

乍晴二首

洗來桐葉晚青青積雨開干暗菌生墻角半傾苔暈合  
蕭蕭風草一蛩鳴

虹長飲雨川無滴蘋末生風沼有波一掃煙雲不知處  
夜天如水瀉銀河

雜題二首

寒雨蕭蕭桐葉驚  
浪浪還作夜埕聲  
西風忽起幽人覺  
枕簟涼時向五更

蒼蒼落月井梧西  
睡覺幽人自卷帷  
只有林鶯知夢斷  
曉庭人靜語移時

徐園閒步二首

平田小雨潤新耕  
曉日園林信脚行  
襯步野蕪吹面柳  
可憐春物總多情

動地春風晚未休  
吹花折柳却成愁  
塵埃不用頻車馬  
獨卧攢榆正擁裘

雜詩二首

邾城山下梅花樹  
臘月江風好在無  
爭似姑山尋綽約  
四時長見雪肌膚

病腹難禁七椀茶  
小窻睡起日西斜  
貧無隙地栽桃李  
日日門前自買花

絕句



伏暑新除風露清五更山舍一雞鳴幽人枕上朦朧睡  
卧看東岡次第明

赴官咸平蔡河阻水泊舟宛邱皇華亭下三首

怒河憑雨正奔流踏踏卑梁滯去舟淹泊我生應有定  
不須歸怨一汙溝

裊裊悲蟬古柳風水邊幽草已鳴蜚長河未放羲和宿  
却放斜陽更向東

夜空如鑑碧新磨倒影踈呈亂素波天色水光無別處

為君垂手攬銀河

春雨中偶成四首

廉纖小雨作春愁  
吹濕長雲漫不收  
架上醅釀渾著葉  
眼明新見小花頭

槐葉青青染不如  
護巢鴉語有新雛  
蕭蕭晚雨窻鳴急  
卧穩藜牀玉枕書

天低芳草接浮雲  
萬柳含煙翠不分  
燕子歸時花徧落  
暮雲和雨入黃昏

春陰只與睡相宜  
卧聽鳴禽語復飛  
一縷斷香浮不散  
何人深院畫熏衣

春詞二首

殘紅新綠間鞦韆  
寒食園林人意閒  
一陣春寒花上起  
畫廊連夜雨珊珊

靄靄芳園誰氏家  
朱門橫鎖夕陽斜  
鳩鳴鵲噪閒庭館  
盡日春風吹百花

遣興

百感摧傷強對春  
看花花畔獨沾巾  
祇應閉目林中坐  
須學無言壁下人

潮水二首

水滿清淮自在流  
落花吹盡浪悠悠  
總將春雨為春淚  
未比思君一半愁

近來消息愈堪猜  
飛鳥無情不肯迴  
惟有清淮慰人意  
春流日日自東來

夏日池上三首

新蟬上樹空遺蛻野雀哺雛爭小蟲粉沾衣袖竹枝雨  
香滿水亭荷葉風

落日鳴蟬夏木荒芙蓉半落柳成行何人紈扇生新恨  
亭館迎秋夜夜涼

拒霜灼灼欲破紅夜來雨落荒蘭叢空亭無人日色午  
但聽桐葉驚秋風

秋日即事三首

支離卧病不知秋暑退初驚大火流蟋蟀知時鳴近壁

銀何照夜直當樓

蕭條歲晚搔雙鬢  
流落天涯念舊遊  
惟有醉來心暫展  
無錢沽酒合長愁

蕭蕭衰草傍牆生  
中有寒蟲白日鳴  
秋物荒涼禾稼熟  
悠悠驅馬水邊行

秋雨二首

南山雲起滿庭陰  
簾幕初涼七月深  
桃子壓枝桐葉老  
連綿風雨作愁霖

離披衰柳已無蟬黃葉閉門風雨天陶令無錢難得醉  
竹窻過午枕書眠

秋夜寄遠


秋晚蕭條風露清星河耿耿漏丁丁祇應新月頻相見  
長向玉樓東畔生

秋夜

微雲淡月夜朦朧幽草蟲鳴樹影中不待南城吹鼓角  
桐聲長報五更風

遠思

裊裊霜風吹碧梧  
孤城殘角奏單于  
山川浩蕩愁千里  
樓閣黃昏月一梳





柯山集卷二十一

欽定四庫全書

集部

柯山集卷二十一至二十六

詳校官庶吉士<sub>臣</sub>汪彥博

侍讀<sub>臣</sub>孫球覆勘

總校官進士<sub>臣</sub>程嘉謨

校對官學錄<sub>臣</sub>常楡

謄錄監生<sub>臣</sub>高憲曾

欽定四庫全書

柯山集卷二十二

七言絕句

宋張耒撰

懷竟陵蓮花

景湖門外有汀洲灼灼紅蓮照碧流  
公子不歸時節晚雨枝風葉卧清秋

懷陸羽井

寒泉背石老松根  
禪室幽人古像存  
長恨千年無屈宋  
楚招難與此遺魂

冬日懷竟陵管氏梅橋四首

旅居澤國小園林  
千里相望歲暮心  
想見竟陵殘雪裏  
新梅點雪橘垂金

小小園林點點梅  
如今綽約為誰開  
只應清夜新霜裏  
依舊橫斜倒影來

他日華陵跡已陳  
嘉辰懷舊一銷魂  
小園幽徑誰相念

應有新梅覓故人

原注復州竟陵郡有五華山故亦云華陵

堂下幽芳自可人  
北風一為屏埃塵  
上元簪珥玲瓏玉  
却曳青霞霜女裾

厄臺寺三首

諸佛蒼然照殿楹  
圓光明滿自然燈  
千年遺事無人問  
館後高眠久屬僧

峨眉前約已成空  
風雨蕭蕭送暮鐘  
何用忘機來問話  
不如松下謁癡龍

世味嗟予淡莫加更將詩句寄煙霞自憐落筆無好字  
不及揚州王謝家

過蘄澤

雄吞六國弱秦強壯士逡巡野水傍耕叟不知鴻鵠志  
笑觀宮室忤陳王

崇化寺三首

樓殿沉沉鎖夜煙秋燈一點佛龕前梧桐葉上三更雨  
亦有愁人獨自眠

白髮荊州嘆滯淫  
吳衣重杵洛城砧  
遺愁莫上高樓望  
只有秋來晝日陰

零落宮牆官樹秋  
行人東去路悠悠  
祇應樓下邯鄲路  
亦有離人對此愁

偶成

漫學文章獎性靈  
屠龍藝就誤平生  
翩翩仕路新冠蓋  
何用揚雄強作經

贈趙簿景平二首

明道新墳草已春遺風猶得見門人定知魯國衣冠異  
盡戴林宗折角巾

紛紛俗物久堪憎愛子蕭蕭眉宇清莫嘆青衫掩事業  
白頭卿相死無名

自遣四首

是非得失一區區蚊蚋啾啾共一壺不學退之求羽翼  
惟憑一夢到華胥

誰云造化本無情利害乘除理甚平莫逐衆情生愠喜



君看三四孰虧盈

誰云至理宗無相大道由來萬法兼且以聲音為佛事  
曉敲清磬誦華嚴

浮世榮枯理易觀不勞重取朽龜鑽直應桃李繁華日  
便把荆榛寂寞看

立秋二首

西風嫋嫋木颼颼身在江湖北岸州自古楚人詞最好  
為君重賦竟陵秋

對酒聊同楚人醉  
哦詩惟聽越吟聲  
洞庭北岸孤城下  
落月西風聽曉鶯

晚步靈壽寺後二首

秋城草樹欲黃昏  
微逕新晴菜甲新  
便好灌園從老圃  
此懷原是漢陰人

逢秋種菊尚殷勤  
隙地侵尋欲過隣  
便好採花供服餌  
形容已似澤邊人

感秋三絕

秋思鄉愁兩苦辛  
每臨西北望秋雲  
此生更老情終在  
誰為寄聲千里人

楚天未白轉星河  
樓角先吹出塞歌  
長愧侵牀五更月  
殷勤無計謝姮娥

高林敗葉已飈飈  
更有寒莎翠已收  
若道神仙脫情累  
如何獨唱感庭秋

局中聽雨

秋庭聽雨斷人聲  
涼入衣裾秋意生  
臨水登山送歸語

憐君解有許多情

夜思

萬聲沉寂漏丁東  
金井欄干上暗空  
半夜西風人未覺  
秋聲先報草根蟲

晨起二首

楚鄉秋早倦炎蒸  
長恨梧桐不可憑  
爽氣忽隨風雨至  
曉堂無寐獨神驚

中宵爽氣入衾裯  
簷雨浪浪曉未收  
三伏炎歊掃除盡

待教明月放清秋

近中秋

姮娥藥熟桂華新滿貯清光待出雲徐御冰輪行碧落  
世間多少感秋人

章華

長恨章華亦陋夫周秦僅可勝登徒誰知南楚仍窮巷  
骨像何妨自應圖

秋晚

日轉秋庭樹影斜風來粉蝶勝悲笳祇應宋玉秋來夢  
常在牆東阿子家

遷居對雨有感

楚鄉風物淡悠悠獨掩閒門客滯留盡日無言對秋雨  
相敲蕉葉各吟秋

竟陵僦舍仍有小園景物頗佳

荒涼臺閣追隨事懶慢江河放逐臣應是主人憐寂寞  
僦居仍有小園春

題西園醪醕

風霜老拚盛龍蛇中有青春白玉葩  
要使根深生意遂不妨秋雨卧泥沙

西軒

出架薔薇秀晚枝雨餘屋角理蛛絲  
可憐一曲秋風地萬思千情闕入詩

九月十日菊花爛開

蕭條秋圃風飛葉却有黃花照眼明  
已過重陽慵采擷

自嫌亦作世人情

讀除目有感

禍福茫茫不可猜可能憑勢即無灾  
相君西閨揮毫日  
豈料方還此地來

效吳融詠情

依依漠漠復紛紛觸處相隨過晚昏  
知是妄緣除不盡  
更教風月助吟魂

竟陵酒官舍北有數步草歲寒霜落猶鬱然也予



為障其風霜暮冬尚自如一日大火焚舍無遺復  
往尋草不復有矣

為愛墻隅芳草色故遮霜霰待新春火燒雨洗尋無處  
祇有東風吹舊塵

臘日步西園

三畝寒園春欲回淺池低樹忽飄梅楚鄉萬里霜雲盡  
歸雁行行斜日來

夏日七首

兩架餘醪側覆簷夏條交映漸多添春歸花落君無恨  
一架清陰恰滿簾

野水彎環夏木森清蟬晚噪碧雲深扁舟兩槳誰家子  
萬里江湖此日心

新簟紗厨與夏宜法曹腰腹大何為重雲到地翻盆雨  
却是幽人穩睡時

千蛙鳴噪汙池水萬螳奔馳一腐蟲得喪世間能幾許  
冥冥高處有飛鴻

涼風一掃宿雲輕  
隱隱收雷不復驚  
試決小池疏積潦  
誰教蛙吻頻無聲

風轉翻翻梧葉驚  
入簷白雨打窗鳴  
應將清絕酬無睡  
穩聽空堦半夜聲

女几山前官舍清  
遶堂鳴澗夜泠泠  
塵埃別後何由見  
簷雨三更起坐聽

晝臥口占三首

康濟朝饑進湯餅  
誰何午睡屬新茶  
讀書隱几聊復爾

謝客扃門豈不佳

甘風遠集聞朝嘯  
怨月深棲有夜鳴  
涼牖踈明稀老翠  
雨畦幽獨立新清

學道窮年要有得  
強顏于世欲何求  
病栽薏苡無勞謗  
濕要韞囊不待搜

贈无咎

欺馬街泥未肯乾  
重城含霧曉漫漫  
誰令萬屋淋漓雪  
猶作長安半夜寒

晚春四首

楊柳藏鴉筍作竿曉風吹雨作輕寒清陰一片收春去  
畱得薔薇數點殷

薔薇倒架筍過隣夢澤茫茫欲晚春綠暗紅稀君莫嘆  
滿枝梅杏欲嘗新

洗雨吹風送晚春盡收紅紫布青雲眼前消長語已久  
清坐不妨長閉門

荒畦零亂滿蕪菁春事收功欲老成鵲噪鳩鳴莫無賴

曉枝千嚀有雛鶯

懷金陵三首

此君堂後青蒼玉  
別後何曾寄一聲  
想見秦淮月堂下  
西風吹浪拍堤平

璧月瓊枝不復論  
秦淮半已掠荒榛  
清溪天水相澄映  
便是臨春閣上魂

曾作金陵爛漫遊  
北歸塵土變衣裘  
芰荷聲裏孤舟雨  
卧入江南第一州

水閣二首

積雨荒池水欲平  
軒窗長夏有餘清  
公餘一枕滄浪夢  
卧聽風荷受雨聲

池水亭亭如有光  
曉風清露點新粧  
翠帷自障非遊女  
多謝經營白鷺郎

出京寄无咎二首

不許多聞長樂鐘  
打包旦遇又匆匆  
長安城裏誰相識  
只有周南太史公

老去相看情益親  
河梁分手欲沾巾  
祇應誦得離騷賦  
長作行吟去國人

讀史二首

區區姦智終何補  
不悟身猶弄伎兒  
蛇斷楚郊秦未覺  
鬼謀曹社夢先知

羸秦餘祚已蛇分  
車府凶高尚畏人  
安有區區猶指鹿  
從來菽麥不曾分

韓信祠

有序



史稱信之族誅予嘗疑之其謂陳豨曰王至上  
必自將予從中起夫使高帝將精兵于外而信  
欲詐驅徒奴烏合之衆于京師雖太公穰苴不  
能以成事此猶魚然于猛虎之穴虎歸則無事  
矣信謀無遺策豈肯為計若是之疎哉况蕭相  
國在長安信獨不畏之耶此殆以高帝出征以  
信失職畏其亂于內亦若彭越使人告之而傳  
致其詞如此耳不然信不忘漂母一飯之恩信

遇高帝恩亦厚矣一旦背之豈人情哉

千金一飯恩猶報南面稱孤豈遽忘何待陳侯乃中起  
不思蕭相在咸陽

題淮陰侯廟

有序

呂太后勸高祖誅彭越使舍人告其反而越固  
未嘗反也特以為名耳高祖將兵居外而太后  
在長安太子仁弱不知兵而韓信方失職在京  
師呂畏其乘時為亂而不可制使人誣告其反

詐召而誅之耳方是時蕭相國居中而信欲以  
烏合不教之兵欲從中起以圖帝業使雖甚愚  
必知其無成以信之雄才謀無遺策肯出此哉  
太史公記陳豨反事言豨居代多致賓客周昌  
畏其不軌而奏召之不至豨因自疑而其後通  
曼丘臣王黃遂反此司馬遷所謂邪人進說遂  
陷不義者也遷載豨反事未嘗一言及信吁此  
遷欲見誅信之寃也

雲夢何須偽出遊遭讒猶得故鄉侯平生蕭相真知己

何事還同女子謀

原注何不為  
信辨其枉也

偃王城

逃戰彭城似去邠興王可即廢為臣中原多少堪憂事

勞苦君王八馬奔

挂劍臺

上國歸來歲月深悲嗟脫劍挂高林欲知不負徐君意

便是當年讓國心

古意

樓上珠簾拂疎網却勻愁黛對凌波也知新舊爭多少  
敢話機頭織素多

道彭澤

姓陶令尹今何在空補陳編歸去來安得春江作春酒  
百年長與子銜杯

柳

永豐坊裏舊腰支曾見青青初種時看盡道邊離別恨

爭教風絮不狂飛

題宣州後堂壁四首

過雨山亭暑氣微  
老人猶未試生衣  
滿園閒綠無人到  
春日南風燕子飛

我欲畱春情不淺  
青春別我苦無情  
敬亭山下紅千樹  
日日南風綠滿城

翠樹陰陰晚雨回  
江山清潤絕纖埃  
軍厨煮酒香初熟  
更釣溪魚斫鱠來

流落天涯一病身  
簿書叢裏費精神  
殷勤照水窺華髮  
黃鳥聲中又一春

宋景平命賦隔窻花影

午睡簾櫳春日長  
半消金鴨水沉香  
隔窻花影時來去  
疑有東隣覘宋郎

晚春初夏八首

陰陰夏景變餘春  
清曉園林未有塵  
日日東風欺弱柳  
鵝黃吹盡作青雲

少室山前日日風望嵩樓下水溶溶卷將春色歸何處  
盡在車前榆莢中

吹盡成蹊桃李塵兔葵燕麥一番新只應解籜抽青玉  
霜節稜稜尚可人

古柳參天鳴啄木青蕪覆地下鳴鳩白頭懶作留春計  
睡起移時獨倚樓

睡足高簷春日斜碾聲初破小龍茶樓邊綠樹飛紅盡  
春色墻陰老薺花



青春已屬明年事  
晝漏初知夏景長  
日日南風筍成竹  
殘紅雖有不成妝

春歸草木漫青紅  
半委塵埃半逐風  
誰似長楸百餘尺  
高張錦繡照青空

醪醑壓架不勝繁  
洗雨吹風更可憐  
姑射仙人本仙骨  
百花凋盡獨嬋娟

梅花十首

月落嚴霜自理妝  
北風工為發清香  
曉英數點辭人去

幽獨無人為斷腸

幽恨清愁幾萬端  
故將巧笑破霜寒  
落英收拾供騷客  
秋菊從來不足餐

姑射仙姿不畏寒  
謝家風格鄙鉛丹  
誰知檀萼香鬚裏  
已有調羹一點酸

林外啼禽自往還  
風前詩客倚闌干  
小園門鎖黃昏月  
耿耿幽姿伴歲寒

玉粟勻圓官樣黃  
領巾借與十分香  
衝寒不為生春物

自要晨霜為洗妝

清寒池館靜無塵  
歲歲相逢似故人  
任遣牆頭疑是雪  
欲教園木早知春

脉脉無言亦有期  
雪中狂殺羽林兒  
可憐多少幽奇事  
却是東風總不知

任教雪壓色終勝  
却要風巖香更聞  
江雨細時青子熟  
聞名猶救渴將軍

數點深藏碧玉枝  
翠峯十二擁瑤姬  
憑君說與凡桃李

徹骨清寒爭解肥

三畝荒園草棘荒可堪  
終夜北風狂  
瑤環瑜珥誰將去  
嘖嘖幽禽啄葢黃

絕句二首

萱草開時燕引雛  
石盆雨滿長菖蒲  
但令甕有賢人酒  
何用門迎長者車

門前山樹插雲青  
雨足山前稻水平  
桑柘半空蠶事了  
綠陰深處囀殘鶯



柯山集卷二十二